

O TEU BUZÓN

CERNA QUER INAUGURAR HOXE UNHA NOVA SECCIÓN NAS SUAS PÁGINAS, BAIXO O RÓTULO DE O TEU BUZÓN. COMO É DOADO ADIVIÑAR, SERÁ UN ESPAZO QUE A REVISTA CHE BRINDA PARA QUE POÍDAS COLABORAR DIRECTAMENTE CON CARTAS, DEBIDAMENTE IDENTIFICADAS (NOME, APELIDOS E D.I.), QUE NON EXCEDAN AS 30 LIÑAS. DENÚNCIAS MEDIOAMBIENTAIS, OPINIÓNS SOBRE A REVISTA, CRÍTICAS E APLAUSOS AO ECOLOXISMO GALEGO, PROPOSTAS DE ACTUACIÓN, RECLAMACIÓNS Á ADMINISTRACIÓN... CONTAMOS CONTIGO DESDE XA PARA FACER DE CERNA, AINDA MÁIS SE CABE, A TUA REVISTA, NATURALMENTE.

DUAS REFLEXIÓNS

Un dos lugares con maior encanto da Arousa é o PARQUE DO CARREIRÁN, na Illa. Toda a marabilla natural que encerra contrasta cos desperfectos e os defectos que un e outros inducimos neste espazo. Os accesos están en estado lamentábel, as praias enchen-se de plásticos e desperdicios que arrasta a marea, os sendeiros polo interior do parque non é raro que estean salferidos de paquetes de tabaco, bolsas de patacas fritas e similares; etc. Ademáis de pedir maior civismo aos visitantes, ¿podería algúha administración (municipal, deputación, consellería...) botar unha man aos propietarios do parque para resolver algúns destes problemas?

En outono, ELEICIÓNS. Torretas de Merza, empacadora de Guixar, empacadora de Vilaboa, embalse de Caldas, plano alternativo a SOGAMA no Morrazo, vertedoiro de Bens, incendios forestais, estado lamentábel da maioria dos nosos ríos, eucaliptización que non acaba... ¿Dará-lles tempo aos nosos políticos candidatos a falar de máis temas en campaña que non sexan o ecoloxismo?

Salustio Cibrán (Arousa)

DESCARGAS DE CARBÓN NA CORUÑA OU A CRISE DO MODELO ENEXÉTICO

Efectivamente, neste momento no que industrias petrolíferas sacan á venda as súas accións con grande despregue de medios publicitarios, presumindo do descoñecemento da selva do Perú, Ecuador... e cun enorme coñecemento das riquezas dos seus subsolos, campaña na que non se menciona para nada a intromisión en terras indíxenas, o movemento dos lindes dos parques naturais nin a contaminación que orixinan os precarios oleoductos e refinerías.

Neste momento no que se esgotan as minas de lignito de As Pontes e de As Encobras, en Meirama, ou deixan de ser rendíbeis despois de furar durante as últimas décadas a nosa paisaxe e a memoria de moitos, nas Encobras, que mobilizaron a unha poboación de campesiños indignada en 1977, apoiada polo xa mítico Crego Roxo, Moncho Valcárcel, a mina comeuse a iglesia, houbo que trasladala, e o camposanto e os sardegos labrados na rocha que non se poideron trasladar. ¿Ulo que fora castelo das Encobras?, leváronno os da mina, pedra por pedra. E cando o carbón chegue de fóra, por lei terán que rexenerar a mina, cubrir o enorme cráter, e xa se fala de facer un lago no seu interior. Dende logo "Mexan por riba de nós e decimos que chove".

Toda esa crise das enerxías foseis que estamos a vivir, mentres non chegamos a un modelo Enerxético Sostíbel, fai preciso atopar un combustíbel de transición: O gas natural. As novas tecnoloxías permiten convertilo en enerxía reducindo os contaminantes do ar nun 90-99% e as emisións de dióxido de carbono (gas que incremente o efecto invernadeiro) serían entre o 30 e o 65% menores, e con costes de producción tamén un 25% menores.

Na combustión, o petróleo emite un 17% menos de dióxido de carbono que o carbón, e o gas natural un 43% menos. A simplicidade deste gas, composto básicamente por metano, e o feito de ter baixos niveis de sofre son algunas das razóns polas que contamina menos o ar que o resto dos hidrocarburos

Prevese que para o ano 2005 a maioria das centrais térmicas do mundo funcionarán con gas natural. En Galicia estás rematando de construir o gasoducto que pasa perto das Pontes e de Meirama. A central térmica das Pontes anunciou xa que estuda incorporar a medio prazo o gas como com-

bustíbel. FENOSA en Meirama non parece nin contemplalo.

A solución ao impacto do peirao do carbón está no gas natural, en tanto non chegan as Enerxías Alternativas. Que os xestores enerxéticos o estuden e o apliquen canto antes. Todos nós, mentres, aforraremos enerxía e pediremos aos concellos que deixen de poñer puntos de luz en cada corredoiria, porque nas noites xa non hai escuridade e con tanta luz non podemos ver as estrelas.

Xacobe Meléndrez Fassbender
Cecebre, maio 1997 (CEMPÉS)

SOBRE O CESE DE CARLOS MUÑOZ

Cóstame traballo entendelo, e lamento enormemente o seu cese como Xefe Provincial do Medio Ambiente Natural, tanto pola estima persoal que lle teño como porque o labor que realizaba nese cargo era o más meritorio que se viña facendo dentro da administración Medioambiental de Galicia, digno de ser recoñecido por todos e que en realidade debería ser imitado por todos polos demais cargos da Administración que se ocupan destes temas. E máis tamén, á vista están os resultados da súa valente xestión, que non foi igualada polo realizado noutras provincias e noutrous ámbitos da Administración.

Dudo moito de quen o sustitúa o poida igualar, ademáis, no seu talante amable, dialogante, de sempre procurar contar coas persoas máis válidas para integralas nos seus proxectos, que foron outros dos xestos moi destacables da súa xestión. Considero un tremendo erro apartalo dese cargo, cousa que resulta difícil de entender

Roxelio Pérez Moreira
Departamento Edafoloxía e Química
Agrícola. Universidade de Santiago de
Compostela.